



清刻龍藏佛說法變相圖

四經同卷

壁六

蒴沙王五願經

瑠璃王經

佛說海八德經

佛說法海經

蒴沙王五願經

壁六

吳月支優婆塞支謙譯

聞如是一時佛在王舍國鷄山中與五百比丘俱時王舍國王號名蒴沙少小作太子意常求五願一者願我年少爲王二者令我國中有佛三者使我出入常往來佛所四者常聽佛說經五者聞經心疾開解得須陀洹道是五願蒴沙王皆得之時王舍國北方有異國名德差伊羅其國王名弗迦沙甚高絕妙宿命時曾更見佛受佛經道學身中

六分經何等六分一者身中有地二者身中有水三者身中有火四者身中有風五者身中有空六者身中心身中凡有是六分萍比沙王與弗迦沙王生未曾相見遙相愛敬如兄弟常書記往來相問遺不絕萍比沙王意常念令我得絕奇好物以遺弗迦沙弗迦沙王亦常意念令我得絕奇好物以遺萍比沙王弗迦沙王國中奄生一蓮華一枚有千葉皆金色遣使者以遺萍比沙王萍比沙王見華大歡喜言弗迦沙王遺我物甚奇有異萍比沙王作書與弗迦沙王言我國中有金銀珍寶甚多我不用作爲寶今我國中生一人華人華字佛紫磨金色身有三十二相弗迦沙王讀書聞佛聲大歡喜踊躍毛衣皆堅宿命曾已見佛故毛爲豎弗迦沙作書與萍比沙王

願具聞神佛所施行教戒當所奉行願具答意弗迦沙王却後數日自念言人命不可知在呼吸間我不能復待萍比沙報書不如便自行見佛弗迦沙王主九十九小國小國王曰來朝弗迦沙勅諸小國王及群臣百官諸兵皆悉嚴駕發行到王舍國佛所道逢萍比沙王書書上言佛教人棄家捐妻子斷愛欲當除鬚髮著法衣作沙門所以者何人愚癡故不當爲者而爲之便爲癡從癡爲行從行爲識從識爲名色從名色爲六入何等爲六入一者眼二者耳三者鼻四者口五者身六者心是爲六此六事皆外向眼向色耳向聲鼻向香口向味身向細軟心向欲是爲六向從六向爲合從合爲痛樂從痛樂爲愛從愛爲受從受爲有從有爲生從生爲老死憂悲

苦不如意惱如是合大苦陰隨習凡合此勤
苦合名人智者自去愚癡愚癡盡衆惡消除
惡消除便行盡行盡識盡識盡名色盡名色
盡六入盡六入盡合盡合盡痛樂盡痛樂盡
愛盡愛盡受盡受盡有盡有盡生盡生盡老
死盡老死盡已憂悲苦不如意惱如是合大
苦陰隨習爲盡便不復生不生即得泥洹道
無爲弗迦沙王讀書竟自思念夜人定後群
臣百官士衆皆卧出寂然無聲竊起亡去入
丘墓間便自剃頭被法衣作沙門無飯食應
器便取冢間久死人髑髏淨刮洗以爲應器
持是髑髏應器轉行到王舍城比沙王國止
於城外舉頭視日念今日至佛所晚明日乃
行弗迦沙王前報窰家願寄一宿窰家言大
善我舍幸寬有宿止處弗迦沙王於外取小

草蓐入於一屏處布座坐其上自思惟五內
佛以天眼從鷄山中遙見弗迦沙王來到王
舍國止於城外窰家佛念弗迦沙王命盡明
日恐不復生相見佛即飛行就到窰家門外
佛報窰家願寄一宿窰家報言我舍幸大可
得相容屬者有一沙門來寄宿自與相報相
便安者便可止宿佛即前至弗迦沙王所言
我從主人寄一宿云當報卿卿寧肯令我一
宿耶弗迦沙言我適有小草蓐纔足坐耳此
舍幸寬卿便自在所欲宿耳佛便自左右取
小草蓐於一處坐佛端坐過三夜弗迦沙亦
端坐佛自念是弗迦沙坐安諦寂寞不動不
搖佛意試欲前問用何等故作沙門受何經
戒喜何等經佛起到弗迦沙前問言卿師受
誰道用何等故作沙門弗迦沙報言我聞有

佛姓瞿曇父字悅頭檀白淨王也其子鬚頭
鬚作沙門得佛道我師事之我用佛故作沙
門佛所說經入我心中我甚喜之佛問寧曾
見佛不弗迦沙言未曾見設使見者寧能識
是佛不弗迦沙言見之不能識佛念是賢者
爲用我故作沙門續當爲子說宿命時所知
經爾乃解疾耳佛語弗迦沙言我爲卿說經
上語亦善中語亦善下語亦善爲卿說身中
六分事善聽之弗迦沙言大善佛言合此六
事能成爲人人身凡六事有所覺知人志
用十八事轉動人意凡有四事道人所當奉
行奉行已志不復轉志不復轉者便得道得
道已不復生不復老不復病不復於今世死
亦不復於後世死亦不復愁亦不復憂亦不
復怒亦不復思亦不復愛是爲度世之道請

解六事合爲人熟聽之一者地二者水三者
火四者風五者空六者心何等爲地地有二
品身外地何等爲身地者謂髮毛爪齒皮
肉筋骨脾腎肝肺腸胃身中諸堅者皆爲地
身地外地同合爲地身外地非我地適無
所復貪愛知者當熟思惟是以自解何等爲
水水有二品身水外水何等爲身水者謂淚
涕唾膿血汗肪髓腦小便身中諸軟者皆爲
水身水外水同合爲水身水外水非我水適
無所復貪愛知者當熟思惟以自解何等爲
火火有二品身火外火何等爲身火者謂身
中溫熱腹中主消食身中諸熱者皆爲火身
火外火同合爲火身火外火非我火適無所
復貪愛知者當熟思惟以自解何等爲風風
有二品身風外風何等爲身風者謂上氣風

下氣風骨間風腹中風四肢風喘息風身中諸起者皆爲風身風外風同合爲風身風外風非我風適無所復貪愛知者當熟思惟以自解何等爲空空有二品身空外空何等爲身空者謂眼空耳空鼻空口空喉空腹空腠空食所出入空是爲身空身空外空同合爲空身空外空非我空適無所復貪愛知者當熟思惟以自解智者學道能自別知身中五分餘一分者心心清淨無欲自念我清潔如是若願欲上第二十五空慧天恐於二十五天上壽數千劫不得脫若復願上第二十六識慧天壽復倍於二十五天上恐爲不得脫若復願欲上第二十七無所念慧天壽復倍二十六天上恐復不得脫若復願欲上第二十八無思想天壽八十四千萬劫恐復不得

脫志便歇苦壽久不得脫便取泥洹道何等爲六事名合者謂目合於色耳合於聲鼻合於香舌合於味身合於細滑心合於知是爲六合何等爲志十八轉者謂目爲好色轉爲惡色轉爲中色轉耳爲好聲轉爲悲聲轉爲惡聲轉鼻爲好香轉爲惡香轉爲臭香轉舌爲美味轉爲惡味轉爲無味轉身爲細軟轉爲麤堅轉爲寒溫轉心爲善事轉爲惡事轉爲世事轉爲志十八轉何等爲四事堅制人者一爲至誠二爲等愛三爲智慧四爲消滅諸惡是爲四堅志目所貪愛得之因快樂快樂離人自覺過去從苦致苦能知爲苦苦已去自知爲脫苦人行苦難得樂當思惟斷諸惡事因得不苦不樂自知遠離諸苦譬如兩木相揩生火因別兩木各著一面火亦滅木

亦冷恩愛合便得苦棄捐恩愛自知爲脫譬
 如鍛金師得好金自在欲作何等奇物臂環
 耳璫步搖花光及百種皆能作之道人持心
 當如是鍛金師自在欲生不假令欲生二十
 五天二十六天二十七天二十八天然審皆
 有是雖久會當壞皆當過去無有常知當復
 過去意不復向不復念不復思不復愛是名
 爲無爲智者自思惟如是乃爲高耳人遠離
 諸惡乃爲智耳目所見萬物皆當過無有常
 無爲亦不復去亦不復來道人知是者便信
 於道無爲最爲至誠未得道時所喜愛樂身
 心所生得道已皆棄捐之人棄所在恩愛是
 名爲無爲志在婬泆故不得脫志在瞋怒故
 不得脫志在愚癡故不得脫道人知是者因
 棄婬泆之心棄瞋怒之心棄愚癡之心拔恩

愛之本斷其枝條截其根莖不復生滋是名
 無爲自念有我志復動無我志復動我端正
 志復動我不端正志復動人豫自念如是是
 爲病是爲劇是爲痛是爲不脫是故不欲多
 念是謂諸苦之要弗迦沙本不知是佛得第
 三阿那含道能知爲佛耳即起以頭面著佛
 足言我實愚癡無狀失於禮敬佛便自現光
 景威神弗迦沙便自悔過言我愚癡人佛言
 若能自悔過爲善令若過除弗迦沙言願持
 我作沙門佛問若作沙門衣鉢具不弗迦沙
 言未具佛言沙門衣鉢不具不得作沙門弗
 迦沙言諾請行具之佛言大善弗迦沙起爲
 佛作禮遶佛三匝弗迦沙明日即入城入城
 未遠城中有少齒犍牛犍走已角觸抵弗迦
 沙諸比丘展轉聞之白佛言佛昨日可於窰

家爲說經沙門辟行具衣鉢爲犇牛所抵殺
如是當趣何道佛言是大長者我爲說經皆
悉心受奉行之即得第三道須陀洹斯陀含
阿那含便棄五蓋一者婬泆二者瞋怒三者
睡眠四者戲樂五者悔疑不正之心今生十
六天上阿那含中便自於天上得阿羅漢度
世去令諸比丘共取弗迦沙身好收葬之於
其上起塔諸比丘即共承受佛教即爲起塔
佛說經已諸比丘皆叉手爲佛作禮

蒴沙王五願經